

*Questi di Colegio introno ma non ballotono,  
e fono cazadi li signati.*

Sier Andrea Trivixan el cavalier.  
Sier Nicolò Bernardo.  
Sier Francesco da Pexaro qu. sier Marco.  
Sier Marco Foscarì.  
Sier Tomà Mocenigo.

Non. Sier Antonio Grimani procurator.  
Non. Sier Zuan Trivixan procurator.  
Non. Sier Piero Contarini qu. sier Alvise.

Et fo proposto, per sier Luca Trun e sier Zuan Venier Cai di X, quali messeno la parte, atento questa materia ocore con il Papa è bon per la Republica nostra cazar li papalisti e far non entrino nel Consejo di X in le materie secrete, e sopra questo fo gran disputation, atento si cazava tre padri di tre reverendi cardinali di la sorte che i sono, *videlicet* sier Antonio Grimani, sier Zorzi Corner el cavalier e sier Alvixè Pixani, quali sariano electi di la Zonta dil Consejo di X, *item*, sier Anzolo Trivixan, et non è tempo di far tal movesta, si faria sdegnar il Papa etc., hor posta la parte, di largo non fu presa, e fo comandà gran credenza. *Etiam* si cazava sier Zuan Trivixan e sier Piero Contarini savii di Terra ferma, et fu preso per li XV di Zonta al solito, et in dusiar di cazar li papalisti *pro nunc*. Parloe sier Marin Zorzi consier.

3\* In questa matina, li procuratori sopra il vender per il Monte Nuovo andono in Rialto, ch'è piú zorni non è stati, et deteno via 10 possession dil Polesene.

*A dì 6, fo San Magno.* La matina, sier Francesco Morexini e sier Maphio Lion avogadori di Comun, con il vichario dil Patriarcha andono a San Zacharia e introno dentro contra il voler di le monache, le qual supra li balconi cridavano: « *Justicia, misericordia, semo sasinade!* » et questo perchè li tolseno una parte di certo dormitorio per meter le monache di San Servolo venute zà piú zorni ad habitar in parte dil dito monasterio, le qual non hanno loco comodo da dormir. Et cussì fono con ditte monache sopra gran parole.

Da poi disnar, fo Gran Consejo per far li do dil Consejo di X che manca. Fu fato Governador di l'intrade. In luogo di sier Batista Erizo, che refudò, rimase sier Carlo Contarini, fo Provedador al Sal, qu. sier Batista. Dil Consejo di X un solo passò: sier Alvise Mocenigo el cavalier, fo Cao dil Consejo

di X. Non passò do officii: Provedador sora le Camere et Provedador sora i Officii.

Vene a Consejo uno francese thesorier dil Re, nominato domino Zuan Gorlier, qual è quaternano (?), et va per vodo a Loreto. È richo e docto; havia assa' francesi con lui. Et in sua compagnia vene a Consejo pre' Batista Egnatio homo dotissimo, e domino Ottavian de Grimaldo merchadante, richo zenoeese, qual habita in questa terra. Sentono di sora i cavalieri.

In questo giorno gionse, e con gran pioza venuto di Padoa, sier Sebastian Justinian el cavalier stato orator nostro in Anglia anni cinque et mexi tre, e sier Marin suo fiol introe Savio ai ordeni.

*A dì 7.* La matina non fo alcuna letera da conto.

Da poi disnar, fo Consejo di X *semplice*, per far la Zonta; et il sopradito sier Sebastian Justinian el cavalier, poi disnar, andò a tochar la man al Principe, et Soa Serenità volse l'intrasse Consier, e cussì andò nel Consejo di X.

Fono electi XV di la Zonta, i quali sarano notadi qui soto. *Item*, feno Cassier, per mexi 4, sier Zuan Marzello, è sopra l'artelarie, sier Giacomo Badoer per uno anno. Nota. Cazete di la Zonta questi soliti a intrar: sier Zacaria Gabriel procurator, sier Zorzi Emo procurator, sier Alvixè Malipiero el Governador di l'intrade, sier Hironimo da Pexaro, fo capitano a Padoa, sier Andrea Mudazo, fo Cao di X, et sier Michiel da Leze, fo Cao di X.

*Questi fono electi di la Zonta dil Consejo di X 4  
per uno anno proximo.*

Sier Antonio Grimani procurator, savio dil Consejo.

Sier Zorzi Corner el cavalier, procurator, savio dil Consejo.

Sier Andrea Griti procurator, fo savio dil Consejo.

Sier Alvixè Pixani procurator, fo savio dil Consejo.

Sier Marco Donado fo Consier, qu. sier Bernardo.

Sier Alvise Dolfin, fo Consier, qu. sier Marco.

Sier Domenego Beneto, fo Consier, qu. sier Piero.

Sier Alvise di Prioli savio dil Consejo, qu. sier Piero procurator.

Sier Francesco Bragadin savio dil Consejo, qu. sier Alvixè procurator.

Sier Batista Erizo, fo Governador di l'intrade, qu. sier Stefano.

Sier Francesco Falier, fo Cao dil Consejo di X, qu. sier Piero.

Sier Marco Donado dotor e cavalier, fo Capitano in Candia, qu. sier Andrea.